

# Yëkkuö skà kit Juan tö i' ta ide mañat

## 3 Juan

Juan tö yëkkuö et ena böt kit e' wák tö i' kit. Ie' tö ikit isini' eköl kiè Gayo e' a. Ie' tö yile patkë' Gayo ska' Jesús tté buaë pakök erë wëm eköl e' ttsòkà taië kiè Diótréfes e' kè éna Juan tö ipatkë' e'pa kiakwà. E' kè mène buaë Juan a, e' kuëkì ie' tö yëkkuö i' kit Gayo a. Ie' wöa iwëne buaë tö Gayo tö s'wöbla'ukwakpa kiekewà buaë e' chak ie' éna Gayo a ena ie' kì ikiane tö e' kí wè Gayo tö es. E' kuëkì ie' tö yëkkuö i' kit.

### Shkë'wè

1 A Gayo, ye' dör blë'këképa, e' tso' yëkkuö i' shtök be' a. Ye' éna be' dalër taië Jesús ttè mokì e' kuëkì.

### Juan tö Gayo kíkékà buaë

2 A yami dalër taië ye' éna, ye' tso' ikiök Skëköl a tö be' mú mir buaë ì kòs tso' be' wà e' a, ena be' mú tso' buaë kè duötà' wës be' er tso' buaë Skëköl ta es. 3 Mik s'yamipa wëlepa dë' ye' ska', età e'pa tö ye' a iyë' tö be' serke buaë kékraë yësyësé wës Skëköl ttè mokìë tö ichè es. E' tö ye' ttsë'wëke buaë. 4 Kékraë mik ye' tö ittse' tö wépa dör wës ye' ala'r es, esepa serke buaë yësyësé wës Skëköl ttè mokì tö ichè es, età e' tö ye' ttsë'wëke buaë tkòkà íyi ulitane tsàta.

5 A yami, be' dalër taië ye' éna, s'yamipa shkòke ká wa'ñe Jesús tté buaë pakök, esepa kiekewà be' tö buaë kékraë, bua'iewà wépa kè sùule be' wà esepa. 6 Ie'pa wëlepa dene sa' ska', e'pa tö be' paké Skëképa Jesús icha erule e'pa a tö be' éna ie'pa dalër taië. Ye' tö be' a ichè tö ie'pa esepa kí kìmú. Ì kòs kiane ie'pa kì shkoie Jesús tté buaë pakök, ese kòs wa ie'pa kìmú. Ie'pa kìmú er bua' wa wës Skëköl kì ikiane es. 7 Ie'pa mi'ke ká wa'ñe kanëblök Jesucristo a, ie'pa kè tö ì kietà' pë' kè tö Skëköl dalöietà' esepa a. E' kuëkì ie'pa kìmú. 8 Se' ulitane kawötà' ie'pa kìmuk, ì kòs kiane ie'pa kì e' wa. Es se' kòs tö ie'pa kimekeñak Jesús tté mokì e' wà pakök.

### Diótrefes dör se' e' ttsòkã taië ese

<sup>9</sup>Skëképa Jesús icha erule serke a' kã a, e'pa a ye' tö yëkkuö kit. Erë wëm tso' ee eköl kië Diótrefes, e' wöbatsö e' tkòkã imalepa wökirie, e' kuekì kawö mène ye' a Jesús ttekölie, e' watéttsaitö. <sup>10</sup>E' kuekì mik ye' de a' ska', etã ì sulu wamblé ie' tö, e' cherakayö a' ulitane kukua. Ie' tso' kachök ye' ta. E' kíie ta mik s'yamipa de a' weblök, etã e'pa kè kiëwã ie' tö. A' welepa éna ie'pa kiakwã e'pa wöklö'wekeitö, uyekettsaitö Skëképa Jesús icha erule e' shüa.

<sup>11</sup>A yami dalër taië ye' éna, ì sulu wambleke pë' tö, ese kè wamblar be' tö. E' skéie pë' ser buaë yësyësë, es be' senú buaë yësyësë. Yi serke yësyësë, ese dör Skëköl icha. Yi e' wamblö sulu, ese kè bätse Skëköl mik.

<sup>12</sup>Sulitane tö icheke tö wëm kië Demetrio, e' dör pë' buaë. Ie' serke buaë yësyësë wes Skëköl ttè mokì tö ichè es. E' wa iwënewã tö ie' dör pë' buaë. Ñies sa' tö ichè tö ie' dör pë' buaë. Be' wã ijcher tö ì kos cheke sa' tö e' dör mokì.

### Juan e' chéat

<sup>13</sup>Ye' wã íyi tso' taië chë be' a, erë kè ye' éna ishtak yëkkuö kì. <sup>14</sup>Ye' mú mi' be' ska' bet, e' wa ye' tö be' a iwà chë.

<sup>15</sup>As be' ttsë'r buaë. Íe s'yamipa tö be' shke'wëmi. S'yamipa tso' be' ska', e'pa shke'ú ña eköl eköl.